

განმარტებითი ბარათი

„პორტაბელურობის დებულების დამტკიცების თაობაზე“ საქართველოს კომუნიკაციების ეროვნული კომისიის 2010 წლის 6 ივლისის N3 დადგენილებაში ცვლილების შეტანის თაობაზე

საქართველოს კომუნიკაციების ეროვნული კომისიის დადგენილების პროექტზე

„ელექტრონული კომუნიკაციების შესახებ საქართველოს კანონის“ მე-11 მუხლის მე-3 პუნქტის ო) ქვეპუნქტის თანახმად, საქართველოს კომუნიკაციების ეროვნული კომისიის (შემდგომში „კომისია“) ერთ-ერთი ძირითადი ფუნქციაა სააბონენტო ნომრების პორტაბელურობის დებულების დამტკიცება. კომისიამ 2010 წლის 6 ივლისს მიიღო N3 დადგენილება „სააბონენტო ნომრების პორტაბელურობის დებულების დამტკიცების შესახებ“.

კომისიას მომზადებული აქვს „სააბონენტო ნომრების პორტაბელურობის დებულების დამტკიცების შესახებ“ კომისიის 2010 წლის 6 ივლისის N3 დადგენილებაში განსახორციელებელი ცვლილების პროექტი, რომელიც შეეხება, როგორც ფიქსირებული, ისე მობილური საკომუნიკაციო ქსელებით მომსახურების მიწოდებაზე ავტორიზებული პირების მიერ მომხმარებლების პორტირების წესებს.

ზემოაღნიშნული დადგენილების მოქმედი რედაქციით, ფიქსირებული საკომუნიკაციო ქსელებით მომსახურების მიწოდებაზე ავტორიზებული პირი ვალდებულია უზრუნველყოს მომხმარებლის უფლება და შესაძლებლობა შეინარჩუნოს სააბონენტო ნომერი, ნუმერაციის იმავე გეოგრაფიულ ზონაში სხვა ფიქსირებული საკომუნიკაციო ქსელებით მომსახურების მიწოდებაზე ავტორიზებული პირის ქსელში პორტირებისას. დადგენილება არ ითვალისწინებს მსგავს ვალდებულებას, ადგილობრივი დაშვების სადენიანი ფიქსირებული სატელეფონო ქსელიდან (მათ შორის VOIP – ინტერნეტ პროტოკოლით ხმოვანი სატელეფონო კავშირიდან) ფიჭური ორგანიზების ტიპის ელექტრონული საკომუნიკაციო ქსელებით ფიქსირებულ ქსელში პორტირებისას და პირიქით.

განსახორციელებელი ცვლილების შესაბამისად ფიქსირებული საკომუნიკაციო ქსელებითა და საშუალებებით მომსახურების მიწოდებაზე ავტორიზებული პირი ვალდებული იქნება უზრუნველყოს მომხმარებლის უფლება და შესაძლებლობა შეინარჩუნოს იგივე გეოგრაფიული სააბონენტო ნომერი ფიქსირებული საკომუნიკაციო ქსელებითა და საშუალებებით უზრუნველყოფაზე ან/და მომსახურების მიწოდებაზე ერთი ავტორიზებული პირის მეორეთი შეცვლისას, ნუმერაციის ერთი და იგივე სააბონენტო გეოგრაფიულ ზონაში, არაგეოგრაფიული ნუმერაციის რესურსის შემთხვევაში ნებისმიერ გეოგრაფიულ ზონაში.

ცვლილების აღნიშნული რედაქცია შესაბამისობაშია ევროპის ელექტრონული კომუნიკაციების კოდექსთან და ევროპის საუკეთესო პრაქტიკასთან.

მობილური სააბონენტო ნომრების პორტირების პროცესის გამარტივების მიზნით, კომისია მიზანშეწონილად მიიჩნევს, რომ „სააბონენტო ნომრების პორტაბელურობის დებულებაში“ შესაბამისი ცვლილების განხორციელების გზით, გამარტივდეს ფიზიკური პირების მიერ მობილური სააბონენტო ნომრის პორტირების განაცხადის წარდგენის პროცედურა და მომხმარებელმა (ფიზიკურმა პირმა) ოპერატორის სერვისცენტრში მისვლის გარეშე, დისტანციურად შეძლოს პორტირება მისთვის სასურველ ქსელში.

დაგეგმილი ცვლილებით, მობილური ქსელით მომსახურებაზე ავტორიზებული პირი ვალდებული იქნება უზრუნველყოს ისეთი პორტირების პროცესი, რა დროსაც მომხმარებელს (ფიზიკურ პირს) ექნება დისტანციურ რეჟიმში, პორტირების თაობაზე, განაცხადის წარდგენის შესაძლებლობა. განსახორციელებელი ცვლილება ითვალისწინებს, რომ ახალი სიმბარათი მიიღოს მობილური სააბონენტო ნომრის მფლობელმა პირადად ან, პორტირების თაობაზე განაცხადის დარეგისტრირებისას, მითითებულმა ფიზიკური პირმა, როგორც ოპერატორის სერვისცენტრში, ისე მისთვის სასურველ მისამართზე. კომისია აღნიშნავს, რომ პორტირების პროცესის გამარტივება ხელს შეუწყობს ბაზარზე კონკურენციის გაზრდას, რაც თავისთავად დადებითად აისახება მომხმარებლებზე.

ზემოაღნიშნულიდან გამომდინარე, კანონქვემდებარე ნორმატიული აქტის პროექტის მიზანია გაჩნდეს შესაძლებლობა, რომ გეოგრაფიული სააბონენტო ნომრის პორტირება განხორციელდეს ფიქსირებულ საკომუნიკაციო ქსელში იმავე გეოგრაფიულ ზონაში, ხოლო არაგეოგრაფიული ნომრის შემთხვევაში მომხმარებლის პორტირება განხორციელდეს ნებისმიერ გეოგრაფიულ ზონაში. ამასთანავე, დაინერგოს მობილური სააბონენტო ნომრების, ოპერატორის სერვისცენტრში მისვლის გარეშე, დისტანციური წესით პორტირება.

დადგენილების პროექტის მიღება გავლენას არ მოახდენს სახელმწიფო ბიუჯეტის საშემოსავლო და ხარჯვით ნაწილებზე.

დადგენილების პროექტის ავტორია საქართველოს კომუნიკაციების ეროვნული კომისია.